

Èn ils socialdemocrats vegnids memia pulits?

Linard Candreia ha dà pled e fatg a La Quotidiana

CUN LINARD CANDREIA
HA MARTIN CABLZAR DISCURRÌ

■ **Sonda passada è sa retratg Linard Candreia (Glion) suenter quatter onns dal presidi da la Partida socialdemocrata dal Grischun. La Quotidiana ha discurre cun il president che sa retira per trair cun el ina bilanza dal passà e per mirar en l'avegnir.**

Linard Candreia, suenter quatter onns essas Vos sa retratg sco parsura da la Partida socialdemocrata dal Grischun. Essas Vos unfts da la politica?

Linard Candreia: Na, in summa betg. Jau nizzegiel dentant la chaschun da metter in zichel auter ils binaris da mia veta professiunala e privata per ils proxims onns. Jau vi ma tegnair avert per differentas opziuns ed oravant tut s'occupar dapli da la famiglia.

Sa deditgar dapli a la famiglia

Avant Vossa activitad politica essas Vos era stà engaschà sin plaun cultural. Vegn ins puspè a chattar Linard Candreia sco dirigent d'in chor ni sco autur da cudeschs?

Pil mument è tut anc avert. Jau less guidagnar ina certa distanza e cunzunt esser agen patrun da mes temp liber.

In nov mandat politic na stat pia betg en discussiun pli?

Quai na less jau betg excluder per tut pretsch. Jau hai semplamain terminà uss in tgapitel politic, savess dentant m'imaginar da returnar en in pèr onns puspè en la politica sche la constellaziun è favuraivla. En scadin cas vegn jau ad observar e perseguitar vinavant attentamain ils affars politics.

Tge success savais Vos nudar en ils quatter onns da Voss presidi?

Nus avain gè success en differentas elecziuns, vain pudì augmentar essenzial-

main il dumber da commembers e fundar intginas novas secziuns. Nus essan stads preservads da carplinas pli grondas, la partida (almain sin plaun chantunal) è stada serrada ed ha uschia pudì far valair sia influenza. Tut en tut hai jau era gè grond sustegn da la giunta e surtut da la basa.

Jau sai dentant era m'imaginar ch'i ha dà trumpadas?

Gea, era dischillusiuns hai dà en mes temp d'uffizi. Il president d'ina partida sa chatta en ina pusiziun da «sandwich», el è permanentamain tranter massa e martè. Dad ina vart sa tracti da equilibrar las differentas tendenzas entaifer la partida e da tuttina demonstrar unitad e cleras posiziuns anovers. Sco persuna privata sun jau uss distgargià da quest burdi.

Vus vegnids taxà ton d'adherents sco d'adversaris politics sco idealist, dentant era sco fanaticher. Constat quest maletg?

Els pon avair in zichel raschun. Sche jau pren a mauns insatge, lu fetsch jau quai cun acribia ed engaschament cumplain. Sche jau sun persuadì d'insatge lu s'identifitgeschel jau cumplainein cun questa chaussa. Uschia sai era dar fasas nua che ins exagerescha inpau. Per ina partida sco ils socialdemocrats che ston batter e cumbatter en il Grischun per scadin post e per scadin idea na datti nagina autra letga che da s'engaschar cumpainamain e cun ardur

Idealist fanatisà?

La partida ha gè tut en tut success. Main positiva è Vossa bilanza persuasiva. Vos avais candidà pil cussegl naziunal e per il cussegl grond, tuttas duas giadas senza success. È quai frustront per in president da partida fitg engaschà?

Jau stos conceder sinceramain che questas terradas han fatg mal a mi. Jau avess gè differentas ideas che ins avess



En l'avegnir vul Linard Candreia sa deditgar dapli a sia famiglia. Nossa foto mussa Linard Candreia cun sias duas filias.

pudì realisar per il bun da la regiun Surselva. Sche jau fiss vegnì elegì en il cussegl grond fiss jau s'engaschà cun slontsch per questa regiun. Jau avess bugen fatg insatge per la regiun sin plaun politic. La constellaziun è dentant stada fitg pauc favuraivla per in socialdemocrat en ina regiun dominada da la pcd. La consequenza è stada ina certa resignaziun ed emigraziun interna, ins mira la finala pli fetg per sasez.

Daco n'èsi betg reussì a la psd da fitgar meglier pe en Surselva?

En Surselva avain nus recaltgà in dumber traidubel da commembers en cumparegliazion cun avon tschintg onns ed er il dumber da simpatisants è creschi. En Surselva è la pcd dentant la partida ferma che cumonda las festas. Ils liberals e la Partida populara sa pendan vi dal scussal da la pcd. Tenor mes avis regia en Surselva anc adina ina monocultura politica che è da donn per la regiun. Er la Surselva dovra a lunga vista ina politica pluralistica, da quai sun jau persuadì

La Partida socialdemocrata vegn identifitgada oz adina pli fetg sco partida dals scolasts e dals intellec-

tuals. Han ins emblidà ils simpels lavurers?

Emblidà ils lavurers?

Scadina partida fa atras ses svilup. La psd è naschida sco partida dals lavurers ed ha slargià sia basa ils davos onns pli e pli fetg era cun academichers. Cun ina solida lavur da basa ston ins tschertgar d'integrar en l'avegnir anc pli fetg ils lavurers.

L'image da la Partida socialdemocrata grischuna è dentant tut auter che quella dal simpel lavurer. Vos avais in cussegl naziunal che abitescha feudal en in chastè, Vos avais in cussegl naziunal che va cun Mercedes per las vias (exceptè da las turas cun velo durant la champagna elctorala). Èn ils socialdemocrats grischuns daventads capitalists?

L'engaschament social na dependa betg da tals simbols da status, da las entradas ni da la pusiziun entaifer la societad. In-

dependentamain da la bainstanza persuasiva san noss exponents s'engaschar per justia sociala, per postulats ecologics e per ina Svizra averta.

La Partida socialdemocrata è s'engaschada da cuminanza cun las partidas burgaisas per in Campiunadi mundial e Voss cussegl naziunal Claudio Lardi fa part dal presidi da la Task Force per l'olimpiada. N'è quai betg in tradiment dals ideals socialdemocrats per in turissem miaivel cun in niz da lunga durada?

L'olimpiada è per nus nagin tema

La psd s'engascha cun persuasiun per in turissem miaivel che tign quint da las resursas indigenas ed intenda in niz da lunga durada. Il campiunadi mundial è anc en in rom survevaivel che nus savain responsar. Encuntercomi n'è ina olimpiada en il Grischun per nus absolutamain nagin tema, damai ch'i sa tracta qua d'in arranschament gigantic cun effects negativs per l'ambient.

È la Partida socialdemocrata daventada ils davos onns memia pulita e curtaschaivla. È quai tactica vulida ni casualitad?

Jau na pos betg confermar che la psd saja daventada pli pulita ils davos onns. Sa tgapescha che quai è savens ina dumonda dal temperament persuasiva dals singuls exponents. Entaifer la psd avain nus differentas alas ed jau sun sa stentà da na betg polarisar memia fitg.

Tgè cussegls dais Vos a Voss successur Peter Payer?

In president partent na duess betg dar cussegls a ses successur. Peter Payer ha sco pledader da la psd svizra gronda esperienza politica ed jau sun persuadì ch'el vegn a far bain ses pensum. Entaifer la partida sto el sa stentar da tegnair ensemen las differentas alas, anovers astga el absolutamain sa profilar cun posiziuns pointadas e cleras.